

BOSNA I HERCEGOVINA
MINISTARSTVO ODBRANE – OBRANE



БОСНА И ХЕРЦЕГОВИНА
МИНИСТАРСТВО ОДБРАНЕ

**POLITIKA PRIKUPLJANJA OBAVJEŠTAJNIH PODATAKA
IZ LJUDSKIH IZVORA U FUNKCIJI VRŠENJA VOJNO-
OBAVJEŠTAJNIH POSLOVA (HUMINT)**

Sarajevo, septembar 2022. godine

Stranica sa podacima o prethodnim verzijama/ažuriranju dokumenta

V-2

**PODACI
o prethodnim verzijama/ažuriranju dokumenta**

Verzija	Naziv dokumenta	Broj dokumenta	Datum donošenja
1	Politika HUMINT-a	P-INT-08-04-1-243/08	24.10.2008.
2	Politika prikupljanja obavještajnih podataka iz ljudskih izvora u funkciji vršenja vojno-obavještajnih poslova (HUMINT)	08-03-8-1572-3/22	27.09.2022.

SADRŽAJ

POGLAVLJE I

OPĆE ODREDBE

1. Svrha	4
2. Cilj	4
3. Primjenjivost	4
4. Rodna ravnopravnost	4
5. Reference	4
6. Definicije pojmova	5

POGLAVLJE II

MISIJA, PRINCIPI I CILJEVI HUMINT-a

1. Misija	6
2. Principi	6
3. Ciljevi	7

POGLAVLJE III

VRSTE, OPSEG PRIMJENE I METODE HUMINT-a

1. Vrste HUMINT-a	7
2. Opseg djelovanja HUMINT-a	8
3. Metode HUMINT-a	8

POGLAVLJE IV

ORGANIZACIJA, OSOBLJE I FUNKCIJE HUMINT-a

1. Način organiziranja HUMINT-a	9
2. Osoblje HUMINT-a	10
3. Funkcije HUMINT-a	11

POGLAVLJE V

NADLEŽNOSTI I ODGOVORNOSTI

1. Nadležnosti ministra odbrane	11
2. Odgovornosti Sektora za obavještajno-sigurnosne poslove MO BiH	11
3. Odgovornosti Zajedničkog štaba OS BiH	12
4. Odgovornosti Operativne komande OS BiH	12
5. Odgovornosti Komande za podršku OS BiH	12
6. Odgovornosti Vojnoobavještajnog bataljona	12

POGLAVLJE VI

PRELAZNE I ZAVRŠNE ODREDBE

1. Donošenje dokumenata	13
2. Ažuriranje Politike	13
3. Stupanje na snagu	13

Na osnovu člana 61. Zakona o upravi ("Službeni glasnik BiH", broj: 32/02, 102/09 i 72/17), te člana 13. stav (1) tačke o) i z) i člana 15. tačka h) Zakona o odbrani Bosne i Hercegovine ("Službeni glasnik BiH", broj: 88/05), d o n o s i m

POLITIKA PRIKUPLJANJA OBAVJEŠTAJNIH PODATAKA IZ LJUDSKIH IZVORA U FUNKCIJI VRŠENJA VOJNOOBAVJEŠTAJNIH POSLOVA (HUMINT)

POGLAVLJE I OPĆE ODREDBE

1. Svrha

Svrha donošenja Politike HUMINT-a (u daljnjem tekstu: Politika) jeste sistemsko uređenje normativne, formacijsko-organizacijske, materijalno-tehničke i razvojne domene HUMINT-a, što će osigurati adekvatan okvir za zakonitu primjenu ove doktrinarno odobrene vojnoobavještajne discipline u Vojnoobavještajnom rodu Oružanih snaga Bosne i Hercegovine (u daljnjem tekstu: VOR i OS BiH).

2. Cilj

Cilj Politike je uspostavljanje jasnog normativno-pravnog okvira za primjenu, razvoj i unaprjeđenje vojnoobavještajne discipline HUMINT-a u domeni pružanja vojnoobavještajne podrške za provedbu misije i zadataka Ministarstva odbrane (u daljnjem tekstu MO) i OS BiH u zemlji i inozemstvu, te dostizanje potrebnih sposobnosti za integriranje ove vojnoobavještajne discipline u arhitekturu PC L 3003 ISTAR.

3. Primjenjivost

Politika se primjenjuje u MO BiH i OS BiH, u zemlji i inozemstvu, kroz funkciju stručnog nadzora, primjene i saradnje sa nadležnim državnim agencijama/tijelima.

4. Rodna ravnopravnost

Izrazi koji su u ovoj politici dati u jednom gramatičkom obliku, bez diskriminacije se odnose i na muškarce i žene. U označavanju funkcija, zvanja i titula, upotrebljava se rodno osjetljivi jezik.

5. Reference

Referentni normativni i pravni propisi kojima se regulira oblast vojnoobavještajne discipline HUMINT-a su:

- a) Zakon o odbrani Bosne i Hercegovine ("Službeni glasnik BiH", broj: 88/05);
- b) Zakon o upravi BiH ("Službeni glasnik BiH", broj: 32/02, 102/09 i 72/17);
- c) Zakon o učešću pripadnika Oružanih snaga BiH, policijskih službenika, državnih službenika i ostalih uposlenika u operacijama podrške miru i drugim aktivnostima u inozemstvu („Službeni glasnik BiH“, broj: 14/05);

- d) Zakon o službi u Oružanim snagama Bosne i Hercegovine („Službeni glasnik BiH“, broj: 88/05);
- e) Odbrambena politika Bosne i Hercegovine, broj: 01-011-2978-51/08 od 26.11.2008. godine;
- f) Sporazum o saradnji između Ministarstva odbrane Bosne i Hercegovine i Obavještajno-sigurnosne agencije Bosne i Hercegovine (broj: 08-04-1-52/13 od 21.03.2013.godine);
- g) Pravilnik o radu VOR OS BiH (broj: 08-04-2-84-8/14 od 05.12.2014. godine);
- h) Pravilnik o učešću pripadnika Ministarstva odbrane i Oružanih snaga Bosne i Hercegovine u operacijama podrške miru i drugim aktivnostima u inozemstvu (broj: 07-02-3-1454/15 od 22.04.2015. godine);
- i) Vojnoobavještajna doktrina OS BiH (broj: 08-04-2-2579/07 od 05.06.2007.godine);
- j) 1. Ženevska konvencija za poboljšanje položaja ranjenika i bolesnika u oružanim snagama u ratu od 12. avgusta 1949.;
- k) 2. Ženevska konvencija za poboljšanje položaja ranjenika, bolesnika i brodolomaca oružanih snaga na moru od 12. avgusta 1949.;
- l) 3. Ženevska konvencija o postupanju s ratnim zarobljenicima od 12. avgusta 1949.;
- m) 4. Ženevska konvencija o zaštiti građanskih lica u vrijeme rata od 12. avgusta 1949.;
- n) Dopunski protokol Ženevskim konvencijama od 12. avgusta 1949. o zaštiti žrtava međunarodnih oružanih sukoba (Protokol I), usvojen 8. juna 1977.godine;
- o) Dopunski protokol Ženevskim konvencijama od 12. avgusta 1949. o zaštiti žrtava nemeđunarodnih oružanih sukoba (Protokol II), usvojenog 8. juna 1977.godine;
- p) Dopunski protokol Ženevskim konvencijama od 12. avgusta 1949. o dodatnom znaku raspoznavanja (Protokol III.), sastavljen 8. decembra 2005. godine;
- q) FM 2-22.3 (FM 34-52) Human Intelligence Collector Operations, Headquarters, Department of the Army, United States;
- r) Taktičko terenski priručnik OS BiH 2-06.02, „Osnovne HUMINT aktivnosti,” 2021. godina.

6. Definicije pojmova

U smislu ove Politike, termini korišteni u istoj imaju sljedeće značenje:

- a) Prikupljanje obavještajnih podataka iz ljudskih izvora / HUMINT je vojnoobavještajna disciplina planskog prikupljanja obavještajnih podataka iz ljudskih izvora, koristeći, kako pasivno tako i aktivno, dopuštene metode koje primjenjuju ovlašteni pripadnici VOR-a OS BiH, kako bi se odgovorilo na postavljene obavještajne zahtjeve, te pružila obavještajna podrška izvođenju operacija i zaštiti snaga.
- b) Otvoreni (engl. Overt) HUMINT podrazumijeva primjenu metoda kojima se ne prikriva identitet osoblja koje provodi ili svrha samog HUMINT-a, kao niti organizacijski ciljevi primjene samog HUMINT-a.
- c) Prikriveni (engl. Covert) HUMINT podrazumijeva primjenu metoda kojima se ne otkriva identitet osoblja koje provodi niti svrha samog HUMINT-a, kao niti organizacijski ciljevi primjene samog HUMINT-a.
- d) ISTAR (Intelligence, Surveillance, Target Acquisition and Reconnaissance - obavještajno djelovanje, osmatranje, nominacija ciljeva i izviđanje) je sposobnost sveobuhvatnog koncepta obavještajne podrške zasnovane na modularnom principu integriranja, usklađivanja, planiranja

i djelovanja postojećih obavještajnih disciplina i senzora. Ova se sposobnost VOR-a OS BiH razvija po PC L 3003 ISTAR.

- e) Prikupljači HUMINT-a su ovlašteni pripadnici VOR-a OS BiH koji, primjenjujući zakonite i odobrene metode, prikupljaju obavještajne podatke od ljudskih izvora.
- f) Izvori HUMINT-a su osobe ili organizacije predstavljene osobama s kojima prikupljači HUMINT-a stupaju u neposredni kontakt radi prikupljanja obavještajnih podataka, ili posredno eksploatiraju dokumente, elektronske zapise ili druge stvari nastale u radu obavještajno interesantnih osoba ili organizacija.
- g) Vojno kontrolirano područje je područje vojnih lokacija, kao i privremenih lokacija na kojima borave sastavi i/ili se stacioniraju sredstva OS BiH tokom obuke i izvršavanja njihovih zakonskih zadataka i misija ili posebnih zadataka i misija dodijeljenih Odlukom Predsjedništva BiH, odnosno područje obavještajnog interesa na kojem se provode odobrene obavještajne operacije.

POGLAVLJE II MISIJA, PRINCIPI I CILJEVI HUMINT-a

1. Misija

Misija HUMINT-a je pružanje vojnoobavještajne podrške OS BiH, u zemlji i inozemstvu, u domenu eksploatacije ljudskih izvora za izvršavanje postavljenih misija, primjenom zakonitih metoda, kao i razvijanje sposobnosti modularnog prilagođavanja elemenata HUMINT-a zahtjevima OPM unutar sveobuhvatne ISTAR arhitekture. Ovo podrazumijeva primjenu adekvatne formacije i pozicioniranja HUMINT-a kao vojnoobavještajne discipline, usvajanje doktrinarnih modela koji podržavaju postavljene ciljeve, opremanje i modernizaciju, razvijanje zakonitih metoda, unaprijeđivanje analitičkih sposobnosti obrade obavještajnih podataka, te sposobnost razvoja i obuke HUMINT-a u OS BiH.

2. Principi

Razvijanje i održavanje sposobnosti HUMINT-a u OS BiH je jedan od bitnih elemenata sveukupne vojnoobavještajne podrške misijama i zadacima OS BiH. S obzirom na kompleksnost, naročito u domenu poštivanja pozitivnog zakonskog okvira unutar kojeg se ova disciplina razvija, neophodno je primjenjivati sljedeće principe:

- a) **zakonitost:** dosljedno poštivanje i primjena međunarodnih i domaćih pravnih propisa koji reguliraju ovu oblast, te doktrinarnih i provedbenih propisa, odnosno instrukcija i naredbi nadređenih nivoa,
- b) **konzistentnost, komplementarnost i koordiniranost:** aktivnosti svih nivoa koji su nadležni za provedbu ove Politike komandnom/rukovodnom ili strukovno-funkcionalnom linijom moraju biti koordinirane, usklađene i fokusirane na postizanje istih ciljeva/rezultata,

- c) **efikasnost i ekonomičnost:** postizati postavljene ciljeve uz najmanji utrošak sredstava, principom maksimalne iskorištenosti dostupnih resursa,
- d) **pouzdanost i stručnost:** obavještajni podaci koji se prikupljaju i obrađuju, te se kao informacije distribuiraju korisnicima, moraju generirati stručni i funkcionalni kredibilitet, te potreban nivo analitičke ekspertize,
- e) **interoperabilnost:** sposobnost elemenata HUMINT-a za sinergijsko djelovanje, kako s drugim vojnoobavještajnim disciplinama unutar OS BiH, tako i za efikasno djelovanje u međunarodnom okruženju,
- f) **modularnost:** sposobnost elemenata ili dijelova elemenata HUMINT-a za fleksibilno djelovanje unutar različitih organizacijsko-formacijskih nivoa misijski dizajniranih jedinica/organizacija.

3. Ciljevi

Ciljevi koje MO OS BiH žele postići razvojem HUMINT-a su:

- a) razvojem i adekvatnim organizacijsko-doktrinarnim pozicioniranjem HUMINT-a, kao osnovne vojnoobavještajne discipline, pridonijeti unaprjeđenju sveukupnih vojnoobavještajnih sposobnosti za pružanje vojnoobavještajne podrške donositeljima odluka,
- b) razvijanje i primjena zakonitih i efikasnih metoda HUMINT-a, te razvoj adekvatnog sistema obuke na nivou MO i OS BiH, kao i pristup međunarodnim obukama,
- c) organizacija, opremanje i osposobljavanje elemenata HUMINT-a do dostizanja sposobnosti integriranja u PC L 3003 ISTAR arhitekturu,
- d) dostizanje zahtijevanog stepena interoperabilnosti za integraciju elemenata HUMINT-a u vojnoobavještajne strukture prilikom angažiranja u OPM ili drugim oblicima saradnje unutar PfP ili NATO-a,
- e) generiranje adekvatnog odgovora zahtjevima savremenih vojnih kretanja, gdje se izazovi razvijanja jedine netehničke vojnoobavještajne discipline nameću kao nužnost, s obzirom na sve sofisticiranije kibernetičke prijetnje kojima se može paralizirati rad tehničkih vojnoobavještajnih disciplina.

POGLAVLJE III VRSTE, OPSEG PRIMJENE I METODE HUMINT-a

1. Vrste HUMINT-a

Po svojim obilježjima i metodama, a u okviru svojih zakonskih nadležnosti, VOR OS BiH primjenjuje:

- a) Otvoreni (engl. Overt) HUMINT koji podrazumijeva da se pri primjeni HUMINT-a ne prikriva identitet osoblja koje ga provodi ili svrha aktivnosti, kao niti organizacijski

ciljevi primjene, te se podrazumijeva pristanak izvora HUMINT-a na interakciju. U tu svrhu, primjenjuju se, ali se ne ograničava samo na njih, sljedeće metode: otvoreni razgovori sa građanima BiH, otvoreni razgovori sa predstavnicima partnerskih zemalja, eksploatacija neklasificiranih dokumenata, brifinzi i debriefinzi s pripadnicima OS BiH po povratku iz misija ili dužnosti iz inozemstva, ad hoc i tematski sastanci i konferencije, te ispitivanje izbjeglica i ratnih zarobljenika,

- b) Prikriveni (engl. Covert) HUMINT koji podrazumijeva da se pri primjeni HUMINT-a ne otkriva identitet osoblja koje ga provodi, niti svrha i organizacijski ciljevi primjene HUMINT-a. Pored metoda iz alineja a) u primjeni Prikrivenog HUMINT-a mogu se koristiti i druge kompleksnije metode poput: ispitivanja pritvorenih osoba i ratnih zarobljenika, eksploatacija zarobljenog ili zaplijenjenog materijala, rad s kontaktima i drugo.

2. Opseg djelovanja HUMINT-a

Vrste HUMINT-a iz tačke 1. ovog poglavlja primjenjuju se u sljedećem opsegu:

- a) U Bosni i Hercegovini, u skladu s zakonskim okvirom iz člana 9. Zakona o odbrani Bosne i Hercegovine ("Službeni glasnik BiH", broj: 88/05), primjenjuje se:
 - Puni spektar Otvorenog HUMINT-a opisanog u poglavlju III, tačka 1., alineja a),
 - Izuzetno će se primjenjivati Prikriveni HUMINT u slučaju operativne upotrebe HUMINT-a u okviru provedbe misija i zadataka, u skladu s odlukom Predsjedništva BiH ili po zahtjevu OSA-e BiH u okviru provedbe protivobavještajnih aktivnosti na vojno kontroliranom području, odnosno na području obavještajnog interesa. U ovim će slučajevima ministar odbrane BiH posebnom odlukom definirati opseg djelovanja HUMINT-a.
- b) U Operacijama podrške miru (u daljnjem tekstu OPM) primjenjuju se i Otvoreni i Prikriveni HUMINT, u skladu s dodijeljenom misijom po Odluci Predsjedništva BiH o upućivanju u OPM, odnosno u skladu s odobrenom strukturom i formacijom jedinice koja se upućuje u OPM, te liste osnovnih zadataka koja proističe iz misije. Operativni angažman HUMINT-a bit će kompatibilan mandatu predmetne misije i reguliran Sporazumom o statusu snaga (SOFA).

3. Metode HUMINT-a

Osnovne metode koje se koriste u HUMINT-u su sljedeće:

- a) **Razgovor** sa ljudskim izvorima, uz njihov pristanak pri provedbi HUMINT-a u zemlji i inozemstvu.
- b) **Unutarnji debriefing** je proces prikupljanja informacija kroz razgovore sa pripadnicima OS BiH involviranim u misije/zadatke od obavještajnog interesa ili koji mogu pružiti tražene informacije, kao i sistem debriefinga ili razmjena podataka unutar savezničkih snaga.

- c) **Vanjski debriefing** je proces prikupljanja informacija iz ljudskih izvora koji sarađuju kako bi se zadovoljili zahtjevi za prikupljanje obavještajnih podataka, u skladu s primjenjivim zakonom. Debriefing se može provesti na svim nivoima, u svim operativnim okruženjima. Primarne kategorije izvora za debriefing su izbjeglice, emigranti, raseljena lica i lokalni civili.
- d) **Operacije veze** kao metode koordinacije aktivnosti i razmjene informacija putem oficira ili misija za vezu sa zemljom domaćinom i savezničkim vojnim i civilnim agencijama, te nevladinim organizacijama.
- e) **Ispitivanje** kao metoda sistemskog nastojanja da se pribave informacije kako bi se odgovorilo na specifične zahtjeve prikupljanja putem direktnih i nedirektnih tehnika ispitivanja zadržanih ili pritvorenih osoba, te neprijateljskih zarobljenika. Ispitivanje se uvijek mora provoditi u skladu s ratnim pravom.
- f) **Eksploatacija dokumenata i sredstava** kao metoda pronalaženja informacija sistemskim pregledom, proučavanjem i korištenjem podataka iz otvorenih ili klasificiranih dokumenata, elektronskih dokumenata i zapisa, pregledom komunikacijske opreme, uključujući računare, telefone i terminale globalnog sistema pozicioniranja (GPS), kao i prikupljanje informacija proučavanjem zarobljenog materijala i sredstava.
- g) **HUMINT operacije s kontaktima** su metode usmjerene na uspostavljanje kontakata s ljudskim izvorima koji pristaju na saradnju s HUMINT prikupljačima, u svrhu pružanja informacija.
- h) **Obrada i analiza podataka** ima za cilj da se na osnovu podataka prikupljenih procesom HUMINT-a generiraju obavještajne informacije koje se distribuiraju korisnicima. Preliminarna obrada i analiza podataka dobijenih putem HUMINT-a vrši se na taktičkom nivou od strane prikupljača HUMINT-a, sekundarna analiza i obrada podataka vrši se na operativnom nivou, dok se potpuna obrada i analiza podataka vrši na strateškom nivou.

Gore navedenim ne iscrpljuje se katalog metoda koje se koriste pri primjeni HUMINT-a. Pri apliciranju HUMINT-a mogu se koristiti i druge svrsishodne metode i tehnike, koje su u zakonskim okvirima referentnih domaćih propisa i međunarodnih dokumenata.

POGLAVLJE IV ORGANIZACIJA, OSOBLJE I FUNKCIJE HUMINT-A

1. Način organiziranja HUMINT-a

Organizacija HUMINT-a u OS BiH zasniva se na sljedećem:

- a) Formacijski elementi HUMINT-a nalaze se u organizacijsko-formacijskoj strukturi Vojnoobavještajnog bataljona OS BiH i angažiraju se za pružanje vojnoobavještajne podrške pri provedbi sigurnosnih, obavještajnih i protivobavještajnih misija na svim nivoima u MO i OS BiH.

- b) Pored formacijskih elemenata HUMINT-a iz alineje a), mogu se organizirati i *ad hoc* misijski timovi HUMINT-a, u skladu s potrebama koje proističu iz vojnih misija i zadataka OS BiH, te zahtjeva iz OPM.
- c) Na nivoima OS BiH koji nemaju organizirane timove HUMINT-a, za poslove iz domena sigurnosne i protivobavještajne koordinacije i saradnje po stručnoj liniji s nadležnim službama u BiH, u skladu s Pravilnikom o radu VOR-a, ovlaštaju se obavještajno-sigurnosni oficiri po funkcionalnoj nadležnosti.
- d) HUMINT svojim personalnim, materijalnim, te kapacitetima opremljenosti tehničkim sredstvima, mora biti prilagođen za provedbu svih obavještajnih zahtjeva koji proističu iz vojnih misija i zadataka OS BiH, te zahtjeva iz OPM.
- e) Odgovornost za uspostavljanje HUMINT-a i definiranje opsega njegovog djelovanja je neprenosiva funkcija ministra odbrane BiH, dok se nadležnost za upotrebu i nadzor rada HUMINT-a na postavljenim parametrima delegira nadležnim komandantima / rukovodiocima putem linije komandovanja i rukovođenja.
- f) Strukovno-funkcionalna linija subordinacije primjene i materijalizacije ove Politike adekvatna je vertikalnoj liniji rukovođenja/komandovanja: Sektor za obavještajno-sigurnosne poslove MO BiH – Uprava za obavještajne poslove i sigurnost ZŠ OS BiH – Odjeljenje za obavještajne poslove i sigurnost OK OS BiH / KP OS BiH – komandant/S-2 Vojnoobavještajnog bataljona OS BiH. Zajedničkom interakcijom i sinergijom ovih nivoa uspostaviti će se adekvatan okvir za zakonitu provedbu ove Politike i ispunjavanje njenih ciljeva na matrici definiranih načela.

2. Osoblje HUMINT-a

S obzirom na njegove specifičnosti, te zahtjevnost u cilju dosljednog poštivanja normi međunarodnog i domaćeg prava, osoblje HUMINT-a selektira se na sljedeći način:

- a) Osoblje koje se postavlja na dužnosti u okviru formacijskih elemenata HUMINT-a unutar strukture OS BiH selektira se isključivo iz pripadnika VOR-a OS BiH koji završavaju proces obuke i certificiranja za provedbu HUMINT zadataka.
- b) Oficiri koji su, u skladu s Pravilnikom o radu VOR-a, nositelji ovlaštenja za sigurnosnu i protivobavještajnu koordinaciju i saradnju po stručnoj liniji s nadležnim službama u BiH, selektiraju se po svojoj funkcionalnoj nadležnosti iz pripadnika VOR-a OS BiH nadležnih nivoa, nakon završene obuke, certificiranja i ovlaštenja.
- c) Osoblje koje se selektira za *ad hoc* misijske timove HUMINT-a, u skladu s potrebama organizacije snaga koje se upućuju u OPM ili NATO/EU vođene operacije, selektira se prvenstveno iz HUMINT certificiranih pripadnika VOR-a OS BiH. Izuzetno se, u skladu s potrebama misije, mogu selektirati pripadnici drugih rodova i vojnih specijalnosti, koji prethodno prolaze HUMINT obuku i certificiranje.

3. Funkcije HUMINT-a

Da bi se ispunili postavljeni ciljevi iz ove Politike, neophodno je dosljedno provoditi sljedeće funkcije:

- a) Obuka pripadnika HUMINT-a dizajnira se i provodi u cilju dostizanja planiranog stepena sposobnosti HUMINT-a za provedbu svih misijskih zadataka, te dostizanja adekvatnog nivoa modularnosti i interoperabilnosti koja će omogućiti integriranje, usklađivanje i sinhronizacijsko djelovanje s ostalim vojnoobavještajnim disciplinama unutar ISTAR arhitekture, odnosno u domenu zajedničkog djelovanja s partnerskim vojnoobavještajnim elementima. Interakcijom svih nivoa razvijati vlastite kapacitete vojnoobavještajne edukacije i obuke.
- b) Vježbovni domen u smislu planiranja i angažiranja elemenata HUMINT-a u domaćim i međunarodnim vojnim vježbama, kojima će se razvijati sposobnosti HUMINT-a po principima modularnosti i interoperabilnosti kao nužnih pretpostavki za integriranje elemenata HUMINT-a u ISTAR koncept sveobuhvatne obavještajne podrške.
- c) Razvojni domen i modernizacija u cilju sagledavanja te predlaganja i akvizicije pravovremenih strukturalnih, organizacijskih, tehničko-materijalnih, normativnih i doktrinarnih pretpostavki kojima bi se osigurao razvoj sposobnosti HUMINT-a.

POGLAVLJE V NADLEŽNOSTI I ODGOVORNOSTI

Nadležnosti i odgovornosti u vezi sa organizacijom HUMINT-a u OS BiH su sljedeće:

1. Nadležnosti ministra odbrane

Ministar odbrane nadležan je za uspostavu i definiranje opsega djelovanja HUMINT-a u MO i OS BiH.

2. Odgovornosti Sektora za obavještajno-sigurnosne poslove MO BiH

Sektor za obavještajno-sigurnosne poslove MO BiH odgovoran je za sljedeće:

- a) nositelj je izrade i odgovoran je za implementaciju Politike kojom se uređuje oblast HUMINT-a u MO i OS BiH,
- b) vrši nadzor nad upotrebom i radom elemenata HUMINT-a u OS BiH,
- c) u slučaju potrebe, odgovoran je za saradnju i koordinaciju sa nadležnim državnim agencijama/tijelima u vezi područja djelovanja i opsega upotrebe HUMINT-a,
- d) savjetuje ministra odbrane i predlaže mjere za unaprjeđenje ove ovlasti, u skladu sa važećim zakonskim propisima.

3. Odgovornosti Zajedničkog štaba OS BiH

Zajednički štab OS BiH odgovoran je za sljedeće:

- a) nositelj je izrade svih provedbenih i doktrinarnih akata, u skladu s ovom Politikom kojom se uređuje oblast HUMINT-a u OS BiH,
- b) odgovora za zakonitu upotrebu elemenata HUMINT-a u OS BiH,
- c) vrši nadzor nad upotrebom i radom elemenata HUMINT-a u OS BiH,
- d) definira željene kodove sposobnosti HUMINT-a, kako u smislu razvoja kao partikularne discipline, tako i u okviru ISTAR arhitekture,
- e) kroz Program Vojna odbrana planira sredstva za nabavku opreme i modernizaciju elemenata HUMINT-a.

4. Odgovornosti Operativne komande OS BiH

Operativna komanda OS BiH odgovorna je za sljedeće:

- a) učestvuje u izradi planskih dokumenata i programa obuke HUMINT-a u OS BiH,
- b) vrši komandovanje i nadzor nad upotrebom i radom elemenata HUMINT-a u OS BiH,
- c) planira i inkoorporira angažiranje HUMINT-a u događaje vježbi/obuke,
- d) sagledava i predlaže ZŠ OS BiH prioritetsnu nabavku opreme i modernizaciju u oblasti HUMINT-a.

5. Odgovornosti Komande za podršku OS BiH

KP OS BiH odgovorna je za sljedeće:

- a) sprovodi HUMINT aktivnosti u skladu sa ovom Politikom i drugim regulativnim dokumentima,
- b) učestvuje u izradi planskih dokumenata i programa obuke HUMINT-a u OS BiH,
- c) sagledava i predlaže ZŠ OS BiH prioritetsnu nabavku opreme i modernizaciju u oblasti HUMINT-a.

6. Odgovornosti Vojnoobavještajnog bataljona

Vojnoobavještajni bataljon odgovoran je za sljedeće:

- a) odgovora za ostvarivanje svih sadržaja HUMINT-a u OS BiH i realizira ih u skladu sa ovom Politikom, te ostalim provedbenim i doktrinarnim propisima viših nivoa,

- b) učestvuje u izradi planskih dokumenata i programa obuke HUMINT-a, te provodi proces obuke,
- c) sagledava i predlaže nadređenim nivoima nabavku opreme i modernizaciju u oblasti HUMINT-a.

POGLAVLJE VI PRELAZNE I ZAVRŠNE ODREDBE

1. Donošenje dokumenata

Oblast HUMINT-a regulira se donošenjem odgovarajućih propisa, procedura, akata i dokumenata na nivou MO BiH i ZŠ OS BiH, u skladu sa ovom Politikom.

2. Ažuriranje Politike


Uprava za obavještajne poslove i sigurnost ZŠ OS BiH najmanje jednom godišnje inicirat će pregled ove Politike i, po potrebi, predložiti njeno ažuriranje.

3. Stupanje na snagu

Politika stupa na snagu danom donošenja.

Stupanjem na snagu ove Politike, prethodna Politika (obavještajne aktivnosti na prikupljanju podataka putem ljudskih / „živih izvora”), broj: INT-08-04-1-243/08 od 24.10.2008. godine, stavlja se van snage.

Broj: 08-03-8-1572-3/22
Sarajevo, 27.09.2022. godine



MINISTAR

Dr. Sifet Podžić